

# Kahwin Muda: Wajar atau Tidak?

Oleh: Nasif Sidquee Pauzi

Pensyarah Kanan Akademi Pengajian Islam Kontemporari, UiTM Cawangan Negeri Sembilan

Rasulullah SAW bersabda:

يَا مُعْشَرَ السَّبَابِ، مَنْ اسْتَطَاعَ مِنْ تُمُّ الْبَاءَةَ فُلْتَرَوْجَ، فَإِنَّهُ أَكْبَضَ لِلْتَّصْرِ، وَأَخْصَنَ لِلْفَرْجِ،  
وَمَنْ لَمْ يُسْتَطِعْ فَعَلِيهِ بِالصُّورُ، فَإِنَّهُ لَهُ وِجَاءٌ

Maksudnya: "Wahai sekalian belia! Sesiapa dalam kalangan kamu yang mampu berkahwin, maka kahwinlah, kerana sesungguhnya berkahwin itu akan memelihara pandangan (daripada melihat perkara yang dilarang), memelihara kemaluan (daripada melakukan zina), tetapi bagi mereka yang tidak mampu (untuk berkahwin) maka hendaklah dia berpuasa, kerana puasa itu adalah perisai" (Hadith Riwayat Muslim).

Isu kahwin sewaktu umur muda adalah antara isu yang menarik dibincang dan dibahaskan bagi golongan remaja dan muda mudi masa kini. Secara zahirnya perkahwinan sentiasa digambarkan dengan keseronokan, keindahan dan kebahagiaan. Namun tidak semua perkahwinan itu adalah seperti gambaran tersebut. Banyak lagi isu-isu tidak enak yang melatari sesebuah perkahwinan. Menjadi tanggungjawab pasangan suami dan isteri untuk sama-sama mengemudi bahtera perkahwinan supaya sentiasa dalam keadaan aman dan harmoni.

Berdasarkan hadith yang diletakkan dalam pendahuluan, sememangnya Nabi SAW menggalakkan perkahwinan bagi golongan muda. Walau bagaimanapun dalam hadith yang sama Nabi SAW turut memberi panduan agar golongan yang tidak berkemampuan untuk berkahwin, maka seseorang itu perlu berpuasa bagi mengekang nafsunya. Hal ini kerana apabila berpuasa, nafsu seseorang itu akan mudah untuk dikawal dan ianya dapat memelihara individu daripada terjerumus ke lembah maksiat.

Dua persoalan penting yang wajar untuk difikirkan berdasarkan hadith Nabi SAW ini ialah, siapakah yang dikatakan sebagai golongan belia atau golongan muda yang dianjurkan berkahwin itu? Adakah semua orang muda atau golongan belia itu mampu berkahwin? Menurut Imam al-Qurtubi (m. 671H) syabab atau golongan muda adalah dalam lingkungan umur 16 tahun sehingga 32 tahun, manakala menurut Imam al-Nawawi (m. 676H) pula syabab adalah dalam lingkungan umur bermula baligh sehingga 29 tahun.

Pada pandangan penulis, persoalan tentang umur muda ini bergantung kepada suasana masyarakat setempat. Jika waktu dahulu, mungkin umur 18 tahun sudah dikira matang tetapi pada hari ini umur 18 tahun masih dianggap terlalu muda. Jabatan Perangkaan Malaysia pada tahun 2019 menyatakan bahawa umur penengah (median age) bagi lelaki masuk ke dalam perkahwinan adalah 28 tahun dan 27 tahun bagi perempuan. Berdasarkan pendapat Imam al-Qurtubi dan imam al-Nawawi umur ini dikira masih lagi dalam kategori belia (muda).

Persoalan utama yang penting untuk difikirkan bukanlah soal pada usia berapakah seseorang individu itu layak berkahwin, tetapi yang lebih utama adalah apakah kriteria yang perlu ada pada seseorang sebelum melangkah ke alam perkahwinan.

Penulis menggariskan empat kriteria yang perlu dipenuhi individu sebagai persediaan sebelum berkahwin.

## 1. Pandai Berkomunikasi

Kriteria pandai berkomunikasi adalah kriteria paling utama perlu ada pada setiap individu tanpa mengira lelaki atau perempuan. Pandai berkomunikasi bukan bermaksud pandai bercakap, tetapi ia lebih daripada itu. Pandai berkomunikasi itu merangkumi bercakap dengan jelas, mempunyai kemahiran mendengar yang baik, pandai mengawal diri, sikap yang positif, pandai menyelesaikan konflik, memiliki sikap empati, berani bertanggungjawab dan ada unsur pandai bergurau.

## 2. Sabar

Sikap sabar adalah kunci utama kepada perkahwinan yang berjaya. Jika umur muda dan pandai mengawal kemarahan, boleh bersabar dengan sikap pasangan, dapat menerima kekurangan pasangan, maka tiada halangan untuk seseorang itu berkahwin. Persoalan sabar disebut dalam surah al-Mâ'arij ayat 5 dengan ayat yang cukup indah iaitu "Maka bersabarlah engkau (Muhammad) dengan kesabaran yang baik. Siapa lagi yang wajar kita ikuti contoh kesabaran jika bukan Nabi SAW yang merupakan individu terbaik dalam mengurus rumah tangga?

## 3. Pemurah/ Baik Hati

Kriteria pemurah atau pun baik hati ini disebut dalam bahasa Inggeris sebagai generous yang bermaksud sikap bersedia untuk memberi lebih akan sesuatu. Lelaki atau perempuan yang memiliki kriteria ini sudah pasti akan menyenangkan urusan pasangannya apabila melayari alam perkahwinan. Sikap tidak berkira, suka membantu dan bersedia untuk berkhidmat untuk pasangan akan memastikan keharmonian rumah tangga dapat dicapai.

## 4. Kecukupan Harta

Ramai yang selalu menyebut wang bukan segala-galanya. Walau bagaimanapun hakikat kehidupan ini persoalan kewangan yang kukuh adalah salah satu perkara penting yang wajar difikirkan oleh individu yang hendak berkahwin. Islam menganjurkan umatnya mencari harta supaya dan meneruskan kelangsungan hidup. Harta yang dimiliki memungkinkan seseorang dapat beribadah dengan lebih sempurna. Hanya orang yang mempunyai kelebihan harta dapat menuaikan ibadah zakat, sedekah, waqaf dan sebagainya. Maka wajar bagi seseorang individu yang ingin berkahwin memastikan soal kecukupan harta sudah disempurnakan sebelum membina rumah tangga.

## Penutup

Kahwin muda wajar atau tidak bukanlah persoalan utama yang harus difikirkan, tetapi yang lebih penting ialah tentang kematangan seseorang. Jika individu itu sudah matang, sudah menguasai ilmu fardu ain, memiliki kesabaran, baik hati, sensitif dengan orang lain dan mempunyai kewangan yang cukup bolehlah dia mengorak langkah ke alam perkahwinan, tetapi jika individu itu masih belum boleh mengaji al-Quran dengan lancar, emosi belum matang, mudah marah, mementingkan diri sendiri, tidak boleh berdikari, maka perlulah difikirkan banyak kali sebelum berkahwin.